

## Housi Moser: SPAGAT

S'git Lüt, die hei e Stangpunkt  
U de gits Lüt, die träie ds Fähnli nach em Wind

Die mit em Stangpunkt hei Wurzle,  
meischtens stöh si gar nid, si sitze  
u mängsmal hei si eine sitze  
Si hocke uf ihrne Eier u chö sich nüm fortpflanze  
si aagwachse, geischtig iigmuuret  
Si gloube nütz, si wüsse - zwar weni, aber das derfür todsicher  
Was si nid wüsse – isch o nid wichtig  
Sie hei weni erläbt, aber alls wo wichtig isch, das prägt se  
U was si nid erläbt hei, das gits o nid.

Si hei weni Gfüel, aber di richtige  
Si si lideschaftlich lideschaftslos  
troche, will Füechti schadt em Archiv  
Si hei ke Asichte, will iri Sicht isch die wo gilt  
Si gseh d Wält vo eim Punkt uus – em richtige Punkt  
Eigetlech si se überzügt: *wenn's* e Härrgott gäbti, so wär er wie seie

U de gits Lüt, wie gseit, die gö mit em Wind  
Si Sommervögel u schrägi Vögu u Galgevögu  
Nüt isch ne heilig, alls lö si go  
Si blüeje u blüete, löje u brüete  
si flattere rüebig vo Blüete zu Blüete  
Suechsch se da hie si se scho ängfür  
Nimmsch se id Pflicht, si se scho bi dr Kür  
Ds einzig wod chasch druf zelle bi däne  
Isch dasst uf se nie u niene chasch zelle  
D'Ufgab vo hüt isch uufggää scho morn  
Dr Treuschwur vo JETZT löst sich uuf i dr Luft  
Si si treu nur em Ougeblick, nid emal sich  
Will si sälber gits eigetlich gnou glueget nid  
We Chamäleon wächsle si d Rolle u d Maske  
U wed na probiersch alli abzzie: s'chunt gäng  
E neus Gsicht unger em alte zum Vorschi  
U kes isch de ds richtige, ds einzige, ds wahre  
Alls si nu Teili wo glänze im Liecht  
U meinsch heisch se gfange so schlüüffe si liecht  
Us der Maske, der Rolle, u rolle drvo.

U itze gits Lüt, die si beides in eim  
Böim u Vögu  
verwurzlet u frei  
verlässlich – flexibel  
locker u förmlich  
grosszügig – sparsam  
lieblich u sträng  
zie Gränze wo nötig, tüe Tür uuf wes geit  
chö sitze u stah u loufe u flüge  
alles zu sinere Zit  
Si chöi lose u läse

chöi schnure u scribe  
chöi iigaa uf anger  
hei Meinig u Sicht  
si chöi – da lit s Gheimnis – o strite mit Stil

U mänigsch da glingts ne e Mönsch z überzüge  
u umgkehrt glingt ds glich amne angre mit ine  
nid stur u nid haltlos, nei: offe für Neus  
chösi ds Alte o bhalte, erwitre, verbinge

So bhalte si d Übersicht i däm Salat  
Die Lüt, si beherrsche dr Läbes-Spagat!

O tir, liebi Schriber, o tir müesst ne chönne  
U gwüsser gits mänge da hie wone cha  
Jedes Gschpröch, jedes Spiel, jede Chund isch e Chance  
Je frächer u tümmer de Kärli üs chunt  
Je witer ewägg dr Punkt won er steit  
De Punkt, vo däm uus er so pääget u schreit  
Je gröösser dr Abstang, descht gröösser dr Schritt  
descht geschpreizter ds Spagätle, es ziet un es riisst  
descht besser chasch üebe, drum freued i gäng  
we dr Grabe zwüschinge isch gross, breit u läng!

So gits für Spagäätler e kener Idiote  
ke Tuble, ke Chluure, ke Schinder, ke Teig  
Si alls ume Hälfer wo zeige wies staht  
Mit üsem Beherrsche vom Läbes-Spagat.

*Nid z'wüud, Jubilare, s'hei nüm all e Mueter  
Stürzed nech zerscht itze fröhlich uf ds Fueter!*